

[0244] 7. Mar hwa is de *Jan Kouper* dy't in fers skriuwt *Oon dy leape en trogleerde Gysbert Nauta* (1715B) yn de frentsjerter *Disputatio juridica ad L. Rogatus 33. D. Mandati* fan *Gisbertus Nauta*? Yn 1712 (of 1713) wurdt yn it frentsjerter matrikel ynskreaun *Johannes Couperus. Warraga Frisius*, en it soe dus hiel goed wêze kinne, dat *Jan Kouper* de lettere ds. *Johannes Couperus* fan Stiensgea is. Hy hat, sa fier as ik neigean kin, winliken mar ien konkurrint: *Johannes Kuper* út Stienwyk, dy't yn 1717, as er al jurisconsultus is, noch in latynsk fers skriuwt yn de dissertaesje fan syn stêdgenoat Burgardus ten Broecke. *Johannes Kuper* hat lykwols tsjin, dat er út Stienwyk komt, en yn 1711 ôfstudearre, wylst *Gisbertus Nauta* yn 1711 (of 1712) ynskreaun waard. *Johannes Couperus*

hat wol tagelyk mei Nauta studearre, en, mei't hy in soan wie fan de fryskdichtsjende wergeaster ds. Petrus Couperus, soe it neat net frjemd wêze, dat hy ek - faeks noch earder as syn heit? - oan it frysk dichtsjen slagge is. Yn earsten moatte wy dus wol oannimme, dat Jan Kouper deselde is as de lettere doomny fan Stiensgea, *ds. Johannes Couperus*, berne yn Wergea, doopt yn 1694, studint yn Frentsjer 1712, proponint yn Ljouwert 1716, doomny yn Stiensgea 1720, troud mei Jancke Catharina van Minnen 1726, emeritus 1777 en forstoarn 3 sept. 1781 yn Stiensgea ¹).

1) W. Wijnaendts van Resandt, o.w., p. 21-22.